


九國志

卷一之卷五



大國志

卷一

九國志目錄

卷一 吳

太祖

烈祖

高祖

睿帝

袁襲

劉威

陶雅

李神福

臺濛

張訓

李遇

劉金

秦裴

馬珣

劉存

李簡

柴再用

陳璋

侯瓚

朱景

張崇

王綰

王稔

朱原

陳知新

朱乾祐

卷二

九國志

目錄



宋路振撰

劉信

馮宏鐸

賈公鐸

危全諷

譚全播

李濤

鍾秦章

朱瑾

米志誠

翟虔

張可琮

鄭璠

楊彪

陳祐

劉權

崔太初

陳彥謙

高澧

卷三 吳

田頽

安仁義

朱延壽

徐溫

卷四 南唐

烈祖

元宗

後主

周本

卷五 吳越

武肅王

文穆王

忠獻王

忠遜王

忠懿王

杜建徽

鮑君福

成及

顧全武

黃晟

卷六 前蜀

高祖

後主

王宗裕

王宗壽

王宗鑑

王宗佶

王宗翰

王宗滌

王宗侃

王宗瑤

王宗播

王宗鈇

王宗弼

王宗範

周博雅

晉暉

張造

張勅

李簡

潘在迎

卷七 後蜀

高祖

後主

趙季良

趙庭隱

趙崇韜

張業

武璋

李肇

李仁罕

李延厚

張公鐸

張虔釗

潘仁嗣

龐福誠

李彥琦

孫欽

何重建

孫漢韶

高彥儔

李廷珪

王彥銖

李奉虔

王昭遠

安思謙

焦彥賓

趙進

石處溫

孟思恭

申貴

卷八 東漢

世祖

睿宗

少主

英武帝

蔚進

張元徽

鄭進

衛儔

李隱

卷九 南漢

烈宗

高祖

殤帝

中宗

後主

劉洪操

劉洪杲

蘇章

吳懷恩

陳道庠

邵廷珣

潘崇徹

郭崇岳

黃仁諷

許文稹

卷十 閩

司空

太祖

嗣主

惠宗

康宗

景宗

天德帝

王仁達

楊思恭

留從效

王忠順

陳洪進

卷十一 楚

武穆王

衡陽王

文昭王

廢王

恭孝王

張佖

許德勳

鄧進忠

姚彥章

秦彥暉

王環

王贊

李瓊

呂師周

廖光齊

彭玕

劉昌魯

鄧處訥

龐巨昭

彭師曠

劉言

王達

周行逢

何敬真

卷十二 北楚

宋張唐英補撰

武信王

文獻王

貞懿王

侍中

侍中

李景威

九國志卷一

宋路振撰

吳南唐

太祖以唐景福元年再入揚州至睿帝天祚三年為

太祖

姓楊名行密初名行愍字化源廬州合肥人唐中和三年起兵為亂光啓三年入揚州自稱淮南留後景

福元年七月再入揚州唐以為淮南節度使乾寧二月

庚辰薨年五十四諡曰武忠武義初改諡曰孝武

烈祖

名渥字承天行密長子唐天祐二年冬嗣位五年五

月戊寅為張顥徐溫所弒年二十三諡曰威武義初

高祖

名隆演初名瀛又名渭字鴻源行密第二子唐天祐

五年五月己卯嗣位十六年建吳國政唐天祐為武

睿帝

名溥行密第四子武義二年六月戊申嗣位改元順

九國志

卷一

吳

一

月辛丑薨年二十八追謚曰睿皇帝葬平陵凡改元四順義六年乾貞二年太和六年天祚三年

袁襲

襲廬江人少好學善屬文淵明緯象秦畢之亂高駢辟行密為行軍司馬俾率所部赴難行密猶豫不行襲言於行密曰高駢倦於政事聽惑妖妄彥等雖以誅呂用之為名觀其事乃以暴易亂耳寧知非天將贊於公耶行密善其言乃移檄諸州誘集徒眾將兵數萬長驅至廣陵秦畢害駢襲勸行密縞素舉哀於城下眾皆義之及破賊入城招輯編戶會孫儒兵至行密問計於襲曰今城壁未完賊且盛若儒至圍城是重擾民也不如且避之先是海陵將高霸擁眾來附行密將令以兵屯天長扼儒

來路襲謂行密曰霸擁大眾心持兩端若使居天長是自扼也可因擒其士卒擒而斬之行密遂斬霸而併其兵行密聞孫儒至復欲遁歸海陵襲曰不若歸合肥繕甲兵再議攻取今稽諸乾象公必再來及孫儒逼城行密果自天長返謂襲曰無子吾幾不得歸行密平宣州獲趙鏗留與其弟同館鏗與梁祖有素果遣使來求鏗時襲寢疾行密使人問襲襲曰但斬首送之必無慮也未幾卒襲剛忍好克每欲殺人必折節下之行密哭之曰吾每恤刑而襲好殺享年不永深可哀也

卷一萬八千一百三十四第二頁

劉威

威廬州慎縣人少為小吏豪爽有志節與田頔陶雅俱為行密

奔走之舊行密起淝上及平秦畢有功表領賓州刺史大順初
與安仁義敗孫儒別將劉建鋒於武進其後儒兵益集威與顏
屢為所敗行密將歸銅官威曰今眾寡勢殊殆難與爭然儒焚
室埽壘絕後而來糧若不繼何從供饋公宜勿與戰堅壁以與
之坐待其弊行密然之儒果敗乾寧初表授廬州刺史及行密
承制封拜就遷淮南節度副使行軍司馬東西行營副都統未
幾加使相天祐三年授鎮南軍節度使撫州危全諷率虔吉撫
信之眾十餘萬將復鍾傳舊地時州兵無多士庶大駭威獨傲
然日縱酣飲全諷屯象牙潭不敢輕進及周本破全諷四州初
平渭令威巡視四境撫諭而還先是行密疾病問周隱以後事

隱以威為請威初聞不能無意及移鎮鍾陵復多專刑徐溫請
討威威聞之沮喪計無所出有幕客黃訥謂威曰公受謫雖深
反本無狀能挺然入覲必解前疑也威曰善遂遣訥為先容渭
果復令之鎮天祐十一年卒於鎮年五十八

卷一萬八千一百
三十四第三頁

陶雅

雅字國華合肥人本儒家子儀形魁偉眉目甚秀乾符中天下
將亂始投筆和門會西蕃入寇徵四方兵防秋靈夏雅與行密
淝上軍偕往未幾改隸諸葛爽征沙陀有功從爽鎮河陽還補
廬州衝山指揮使行密據合肥遣雅平鄉盜秦定過修己等遷
八營主將光啟初破桐城吳迥擊李本於柳子山乘勝攻舒州

以雅為舒州刺史為蔡盜許勅潛兵夜至雅奔歸文德初從行
密破趙錕授池州刺史大順中破孫儒軍於人頭山儒平授常
州刺史遷池州團練使田頔攻歙州時給事中裴樞守新安將
歸歛於行密以宣州副使魯郡往代之是時諸將授郡鮮不以
虐歛為事惟雅寬厚人多便之樞因遣問政山人聶師道往說
頔曰苟得池陽陶牧為守州人孰不承命頔驛報行密因令雅
治新安入見樞盡州郡禮樞奇之及樞至京師奏雅為歙州刺
史天福三年田頔以宣州叛雅以州兵助臺濛伐之頔出戰橋
陷墜馬為帳下小卒許渥王綬所殺宣州平兼西南面招討使
先是順義軍使汪武聚盜據婺源行密以為滁州刺史婺源歛

屬邑武恃險未嘗謁雅及頔叛武多行剽劫至是雅移檄聲言
討洪饒由婺源徃武引弟姪十餘人就路迎謁雅頔左右擒殺
之緩轡入其營中無敢動者天祐初陳詢以睦州歸歛吳越遣
萬眾攻詢雅率軍救之軍士夜驚踰營遁去將吏白雅欠伸不
應乃下令曰明旦有軍士不在營者俱斬果遞相傳告未頃而
定明年破婺州虜越州刺史沈夏以功遷衢睦團練使江南都
招討會宣州王茂章叛奔越雅虜茂章伏兵斷其歸路乃領大
將軍金師會領睦州事遂班師新安而越兵大至衢睦婺三州
復沒八年移鎮武昌雅移黟州殷阜上書寢之遂遙領武昌軍
節度加同平章事知歙州團練觀察等事十年八月卒於任年

五十七雅性沈靜好讀書手不釋卷雖臨陣敵常袞衣博帶自幼年戲弄未嘗有錐刀傷手及為大將每矢石交飛終莫能中接賓佐有禮事兄弟以孝敬非公宴不舉音樂踈財重士人以此歸之典黔州二十餘年民感其化生男女或以陶為字焉卷一萬八千一百三十四第三頁

李神福

神福洺州人幼執親喪哀毀過瘠鄉里異之及長沈厚勇敢唐末四境交募勁兵因隸上黨軍籍時高駢兼諸道行營都統神福從州將王重屯淮海因投於行密中和中同安賊陳儒攻刺史高濬遣使來告行密未能救謀於神福對曰此羣盜烏合易

與耳公但聲言赴援可不勞尺刃為公解之乃請本軍旌旗間道以入既夕引州兵出外各持旌旗入列大陣之狀儒果夜遁行密大竒之光啟二年壽州張翺叛寇淝上神福率兵與戰敗之楮城秦畢之亂高駢名行密因遣神福與曲溪劉金盱貽賈令威各以義兵來附破秦畢軍神福功居多會選卒為黃頭軍遷神福為左右黃頭都尉龍紀中涇縣王賞太平稔常滿俱聚盜剽鄉里神福引兵破之但誅其首惡餘皆不問大順二年孫儒前鋒兵屯溧水行密遣神福將兵禦之神福謂諸將曰兵倍不戰况儒衆十倍於我當且避其銳以驕之乃退舍而儒衆果怠神福乃選銳卒躋險夜襲之果大潰又擊儒要山寨破之擒

其將李宏以功改左游奕將銅官鎮遏使田頔為孫儒所敗行密欲退守銅官神福諫曰儒埽境而來利在速戰宜堅壁清野以老其師神福願以本軍據險結柵時出輕騎抄其糧運彼前不能戰退無儲糧此送死之道行密曰善因以神福為宣池兩路都游奕使是夏儒食盡果敗以功奏授左千牛衛將軍景福二年廬州刺史蔡儔叛遣何瓌來寇神福迎擊於青斗山大破之遂傳城下賊平遷左衙都校未幾授舒州刺史天福元年與呂師造攻臨安錢鏐使顧全武來援神福退師令羸老行又令師造設伏青山路自將一軍殿後夜未半全武果盡銳來追神福偽北走伏軍發前返來攻越軍大敗擒全武復攻臨安久不

克先是神福遣使護鏐先塋禁其樵採及獲全武又遣通家問越人皆感之因納其犒賂而返二年改昇州刺史行密以女妻其子承鼎三年攻杜洪於鄂州大敗洪軍時城中積荻山上神福謂諸將曰今夜焚此諸將皆不測是夕遣人乘舟載火炬至灑口分焚樹偽為梁軍來援之狀城中焚荻應之諸將伏其智梁祖遣將韓勅率步騎萬餘屯灑口又令荆南以舟師赴援成汭盡眾浮江而下神福登岸望之曰舟人雖盛然首尾懸絕宜急擊之乃迎戰大別山汭果敗溺水死勅亦引眾遁去自是洪勢益孤會宣州田頔叛劫昇州劫神福與帳下妻子俱歸宛陵厚養之以誘神福行密急書召神福覽書袖之揚言曰鄂州尚

未下又令急取荆南因號令諸軍達閭順流而下顏遣將王壇汪建以舟師援洪又別遣人遺神福書約分地而治神福斬其使擊壇建破之復戰於皖口又敗其衆浮尸棄江而下壇建以輕舟遁去四年以兵屯田梁加西面行營招討使光州團練使疾甚求醫於江都卒年五十三卷一萬八千一百三十四第八頁

臺濛

濛字頂雲廬州合肥人少為金牛鎮將行密據合肥始來歸從征秦畢趙錚俱破敵有功大順中馬敬言為孫儒敗於廣德初儒與李從立乘勝至東谿時城守未固軍士大恐濛以一旅巡谿西會天晦詐令士卒傳諭往返者數四謂大衆屯集中夜皆

遁去及儒柵陵陽濛於魯江五堰作輕舟饋糧終儒之世軍無饑色從行密歸廣陵以功遷楚州刺史乾寧三年破蘇州以濛守之越人水陸大至濛擊敗之錢鏐親率舟師至會糧盡濛拔衆遁歸光化二年行密初得朐山以濛為海州刺史在任貪殘為郡民所訴又為田頔所譖降為漣水制置使天復三年田頔於宣州行密歷數諸將無敵顏者乃謂濛曰非公莫可濛曰顏不守富貴自取滅亡濛今仗大王威武以順翦逆往必擒顏願王無慮行密大悅濛初入其境即翻陣以往軍士俱笑其怯濛曰顏宿將多謀當自過防翌日果遇陣於廣德濛欲奪其銳先以行密書遺顏將校皆下馬拜受因其擾亂濛麾衆擊之顏兵

大敗乘勝遂圍宣城冬十月顯出州外求戰登橋馬墜為外軍所殺宣州平行密承制加濛檢校太保宣州觀察使天祐元年卒於治所年五十

卷一萬八千一百三十四第九頁

張訓

訓字克明滁州清流人身長八尺餘腰帶十圍中和三年歸行密於合肥行密訪以方畧悅之令從石令言攻同川克其城從田頔擊張翱於褚城入擊趙錕昌山兵破之克宣州訓功居多遷左右黃頭指揮使以所部戍廣德拒孫儒於黃池從李神福襲歷陽下滁州孫儒焚廣陵悉銳攻宣州行密命訓潛軍入廣陵滅其餘燎獲軍儲數十萬以賑飢民行密令馬爽守廣陵爽

叛為諸將所殺城中大囂調整師以出眾乃定孫儒之起也毘陵守將劉建鋒從儒俱西土豪陳可兒據毘陵訓率兵奄至城下可兒倉卒出迎訓於馬上手刃殺之奪其兵入城中又率兵

絕儒糧道於安吉馬頭儒敗訓論功為最景福元年從行密歸江都路經毘陵行密顧左右曰毘陵大城也訓一劍下之不亦壯哉即授温州刺史乾寧二年屯兵漣水以備梁師劉知俊聚糧石碣戍守皆潰盡焚其儲糧訓歸路出東海為知俊所邀訓擊大破之青口之役吳師悉起訓帥所部迎行密行密喜以兵千人令為前鋒會朱瑾假梁人兵鋒先入其壘訓登岸疾戰踰柵而入遂破龐從軍以功授淮海游奕使天復三年王茂章平

密州以訓為刺史會梁祖以大軍至訓謂諸將曰城孤師少何以待之皆欲焚城掠聚而去訓曰不可如此則我師難歸遂封府藏下懸門立虛幟於城上遣老弱居前訓自以銳兵殿其後梁軍前鋒至見城上旗多未敢逼數日方入城又見府庫城邑晏然如故亦不追之天祐七年遷黃州刺史卒於治所訓質直勇而多力曾渡毘陵西橋馬驚不渡乃持尾鬣舉之以濟然不恃其勇故多功保全焉

李遇

遇合肥人始事行密帳下光啟中禦梁軍於慎縣遇單騎按槊率先破敵以伍長遷馬軍副指揮使從平秦畢趙鎰孫儒皆有

功遷淮南馬步諸軍都尉累遷常州刺史天復三年安仁義以潤州叛夜襲毘陵仁義善射諸軍多畏避遇背城逆戰仁義喪師自是不敢東顧天祐中宣州王茂章奔越乃以遇為淮南行軍司馬宣州團練使徐溫專政遇不能下之常曰徐溫何人吾所未識溫怒命柴再用將兵送王壇代遇不受命再用攻其城逾月不克時新王遣典客何萇說遇曰公本圖反請斬萇以徇本無反心可隨納欵遇聞王命遂開門委命溫族之孫仁義方嬰為人匿之而免李昇秉政以仁義為縣令

卷一萬八千一百三十五第一頁

劉金

金淮陰洪澤人光啟中江淮兵亂從鄉首李章保曲谿章死金

代有其衆行密營廣陵金盡以其衆來附破秦彥金有力焉文
德初從攻趙鏗於陵陽明年金度鏗必遁思以計擒之因偽與
鏗通好約為外應鏗大以金帛為遺復夜迎金入卧內許妻以
女金歸營慮鏗兵盛出不能制乃遣人臨城大譟云劉郎不能
與爾為女壻也鏗聞之沮喪果宵遁大順中孫儒寇宛陵行密
遣金拒之屢破儒軍以功授滁州刺史行密破鍾離移濠州刺
史未幾遣團練使天祐二年卒子仁規嗣仁規娶行密女渥襲
位遷過口兩城使乾貞初授清淮軍節度使卷一萬八千一百
三十五第一頁

秦裴

裴慎縣人少驍勇頗涉獵以鷹隼為事嘗云天上黃鷹地下黃

金餘不足貴也行密起合肥因隸帳下大順元年奏授檢校左
散騎常侍行密據黃陵以裴知揚子縣有虎入縣郭裴親殺以
獻行密召褒賞之裴曰此衆共殺非獨能制也行密嘆曰勇而
能謙必享富貴歷高郵無錫令俱有能名乾寧五年率兵破越
崑山鎮以千兵守之錢鏐遣顧全武引萬衆來復裴援絕全武
以檄說裴裴封函納欵全武頗自負召諸將聚觀全武曾為僧
發函乃佛經一卷全武大慙裴戰無虛日士卒多病傷死未幾
糧盡告降錢鏐預設千人食以待之及出士卒不滿百鏐讓之
曰軍孤衆寡何苦相拒裴曰但事君盡節死而後已今食盡歸
命非本志也鏐大賞之因熟視裴曰君有藩侯相他日必歸君

餘勿為念裴在越三年絕無歸耗忽一日裴遣人告行密遣李神福攻越臨安鏐遣顧全武方宇救之為神福所擒明年行密送全武及宇易裴以歸天復三年從李神福攻鄂州荆南成汭乘大艦來援裴率兵溯流逆戰汭敗溺水死又攻田頵衆于吉陽磯以功授諸軍都尉從劉存攻夏口破之加昇州刺史天祐三年洪州鍾傳卒州人立其子匡時江州刺史延規傳之養子忿不得立以其郡納款因授裴西南面行營招討使攻匡時至蓼州時軍欲限水為柵裴不聽匡時果遣將劉楚據之諸將相顧失色俱咎裴裴曰城中驍銳惟楚耳若令總衆拒守此城何由卒破吾固留此要害以謀致之既而分軍晨出盡銳破柵既

擒楚方傳於城下未幾城陷擒匡時以獻諸將皆服其智號令嚴肅兵士無敢殺戮洪之士卒俱來就營求其戚屬為出府庫贖還之洪人感悅授洪州制置使張顥用事慮裴為變急召歸及湖口遇鄂帥劉存與潭軍戰沒復授裴鄂岳觀察使會重午裴晏諸將而潭人入寇裴遣弟師鐸師虬乘戰艦先往裴食訖登黃鶴樓以望乃以平頭舫顧小校曰但乘此卷旗奪潭人船以戰及與師鐸軍合乃建大將旗潭人睜眦裴因擊敗之六年入覲因求歸故里以民禮謁縣宰見里中故老必拜坐以少長

為齒九年加武昌軍節度使遇疾求歸至溢中卒年五十九裴在治七年積軍儲二十萬開青山大治公家仰足

卷一萬八千一百三十四

馬珣

珣廬江人少驍勇有機畧初以貨財商於江都會秦畢圍城乃歸鎔鄣軍畢師鐸於城南立高樓以望城中呂用之患焉募壯士摧其樓珣應募夜半獨仗劔入賊營倒之用之厚賞遷十餘級行密入城聞其名錄為偏將與朱延壽相友善乾寧初授珣舒州刺史移守漣水三年梁將朱友恭圍瞿章於黃州命珣率兵授之黃州陷戰不利與張訓呂師造成知進石率等收散兵三百人自黃州間道緣分寧絕山谷而東路經撫州危全諷聞其來布四壘於路壘皆萬餘人珣語諸將曰彼謂我可坐縛也

今與諸軍擊其中堅逐其軍帥取其資而食其穀可以歸矣會夜擊全諷之壘大破之全諷僅免乃飲宴於賊營擇其利兵而用之明日廣張旗幟揚麾伐鼓從山直下衝其連營鋒若雷電賊皆潰走珣凱唱而歸謁行密言其戰狀行密罵之曰懦豎子何不遂據其城珣拜謝不敏珣滑稽好妓樂歌舞雖出師登騎俳諧不輟既而卧疾謂所親曰若患愈當乞師數千可以蕩平西南夷獠俄而卒衆惜其智勇部下將校見其二子無不感慨申敬朱延壽錄其孤而字之延壽敗行密收其二子給與第宅

卷一萬八千一百三十四第十七頁

劉存

存陳州人少拳勇從行密起合肥破秦畢趙鏗皆有功孫儒入寇身先苦戰為賊斷足三指而戰不輟翌日行密出城與儒戰存請先登行密諭以指痛不止因求皮履裹足而往是日平儒以功遷壽州馬軍都尉乾寧中預破葛從周於渾河遷舒州刺史改團練使天復中副李神福攻杜洪於江夏會田頔叛遣將汪建王壇率舟師沂流而下存與神福下瀝池磯逆戰為流矢中目存戰自若建敗存殺獲居多四年復攻江夏時神福病歸存代為招討使引十數騎巡城憇於高崗張樂命飲酒酣鄂兵大至存以旗向江三招而止鄂人望之乞然有頃自退軍中服其膽畧存急焚鄂城樓梁援兵將突圍而出諸將欲急擊之存

曰擊之賊必復入復入則城益固矣不若聽其遁去諸將皆曰善是日城陷擒杜洪父子斬於廣陵市以功授淮南行軍司馬鄂兵都團練使天祐三年率舟師攻潭州大雨不止軍回至瀏陽為潭人所敗執存以歸馬殷親釋其縛欲授以官存大詬曰汝昔歲宣城潰散偶漏我鋒刃今反欲臣我耶殷知不可留乃斬之唐保大中邊鎬平湖南遣使就墳致祭贈宣武軍節度使武衛上將軍

卷一萬八千一百三十四第四頁

李簡

簡上蔡人有膽勇資質瓌偉始隸陳蔡軍中趙鏗選武幹之士因任為帳下親信龍紀初鏗為行密所圍糧盡將逸簡給守門

者得出因奔行密補黑雲隊長大順二年孫儒寇廣德行密將
逆戰會夜屯於行密柵及旦儒軍圍之數重率百餘人挺身突
戰自外破柵拔行密以出遷黑雲都指揮使乾寧二年從攻濠
州濠水深闊簡手搴重甲口銜大刀先渡踰壘破其關鍵擒刺
史張遂以獻從攻壽州加淮南右廂馬步軍都虞侯先是江都
多盜令雖嚴莫能禁止及是為簡獲者必徇其部分姓名所盜
之物盡黥於面於是寇竊皆息三年從田頔破蘇州虜刺史成
及從行密破龐從於青口敗梁軍於淖河副王茂章援青社從
臺濠圍田頔於宣州皆有功簡本姓陳既貴欲復其氏行密謂
之曰天下皆知有李簡何處有陳簡也以是不易渥襲位王茂

章將以宛陵叛命簡率眾攻之茂章聞簡至率眾奔越改楚州
團練使杭人屢寇無錫以簡為常州刺史改鄂岳觀察使天祐
十二年授武昌軍節度使武義初加鎮西大將軍襲復州破之
俘知州鮑唐以獻乾貞二年加西南面招討使入覲卒於采石
江年六十九簡鎮上游之地十餘年重關洞啟敵人不敢侵軼
然忍而好殺又非法重斂鄂兵之高貲者無不破產時論以此
鄙之

卷一萬八千一百
三十四第四頁

柴再用

再用蔡州汝南人性至孝七歲遇龐勛亂舉族避地祖訓鼓不
能去惟再用獨留侍賊見而去之以是大為鄉里所異及長沈

毅有斷面黑如鐵人號為柴黑子會秦宗權召募驍勇再用以
騎射應選時軍令止馬者斬一日戰回藉韉而寢既寤而馬逸
再用追之遇賊於林中環樹而射一發人樹俱貫賊畏走遂奪
馬而歸光啟中從孫儒攻廣陵再用本名存常與軍中小校結
為死友會有告小校謀反儒斬之執再用至儒問何故反再用
不對既伏質又問之始對曰某與彼相結為死友則某反矣公
既誅之復何問焉儒奇之曰汝果不反吾再用汝因令改名再
用儒敗歸行密授先鋒馬軍指揮使乾寧中朱延壽辟為衙將
因遷壽州團練都押衙敗梁兵於壽春遷團練副使從延壽平
劉存於弋陽授知光州軍州事一日大震電家人皆伏匿再用

當戶坐不動俄見青襦袴者四人昇再用所坐牀出庭中復大
震屋楯折有龍出焉梁山寇光山再用擊走之以功遷光州刺
史天祐二年梁祖平趙匡凝於襄漢乘勝畧淮上遣使謂再用
曰苟以城降遷爾蔡州本郡為賞再用乘闥而拜曰此州城小
衆寡王若先下壽州回當自送款梁祖信之攻壽州不拔而返
再用襲之斬首二十餘級以功加檢校太保渥襲位遷楚州刺
史俄授淮南左廂步軍都指揮使越人寇東洲遣再用率兵禦
之賜長稍伍拾戰敗艦破水滿再用為長稍所泛得不溺家人
聞敗飯千僧為禱再用戰歸取其飯召麾下以犒之曰此輩濟
我佛何力之有十一年袁州劉崇景叛引潭將許真為援令再

用攻之近城有萬勝岡再用欲奪之每旦出師岡下不與戰素人頗怠一日列大陣岡南崇景望之氣奪因出戰再用躍馬徑入陣中斬首數十素人大敗崇景棄之而遁武義元年破越軍於無錫遷鎮西將軍領天平軍節度使未幾移鎮武昌改德勝軍節度加中書令卒年七十二再用寬厚淹雅有儒者之風好讀左氏春秋未嘗省視厨廐寮屬白事有不如意但對之假寐諸子娶聘必擇平昔舊族史官王振請述戰功以補方冊再用曰鷹犬之效出自偶然何足紀也累歷藩鎮敦尚儉素車馬導從不過十人亦一時之良將也

卷一萬八千一百三十四第十四頁

陳璋

璋潁州人少橫壯不羈歷事諸帥俱無成乃歸行密未幾復委質於錢鏐景福初授杭州武勇都指揮使改鎮海軍路白使乾寧中領賓州刺史從平董昌詔賜佐忠去偽功臣天復二年鏐將許再用叛據外城召田頔為援頔將樹柵於杭州咽喉之地鏐乘圍觀之大懼出金綵十輦募諸將有能奪其地者與之仍以頔為賞璋應募選驍健三百假護軍白馬以出免胄馳擊往返者數四竟奪之鏐大喜飲之巨觥即授璋衢州刺史與軍校葉讓不協因斬之與睦州陳詢連衡復歸欵於行密鏐以兵圍其州踰月不能出行密遣周本援之拔璋盡室以歸天祐二年行密遣陶雅平婺復授璋衢婺州諸軍事充都招討副使會

王茂章叛雅棄其地改璋池州團練使署淮南節度副使越將張二保陷東洲授璋水陸行營都招討使擊仁保於海曲奪戰船三百艘盡復東洲舊地復乘輕舟入松江九谿偵邏越師大集團之數重璋獨射柁工心目皆應弦而倒因奮銳衝擊長圍遂解軍回泊洞庭見橘林意欲除之謂士卒曰若食餚用此木研酸酪不假他物自有香辛味諸軍皆爭取樹立盡九年以舟師破岳州擒刺史苑玫荆人潭人會於江口邀璋歸路璋乃方舟並貫夜過其所敵人後出已無及矣璋每入敵境或晚泊戒士卒整舟檝待令下當行必此宿軍之所也若移帳下岸修棚習射乃夜多前去越兵寇上饒璋引兵侵蘇湖上饒之兵乃解

乾貞元年加鎮北大將軍領平盧軍節度使溥遣王彥章苗璘舉兵西伐璋謂嚴可求曰朝廷攻湖湘何不用璋與周本彥章與璘可當其偏裨耳其後彥章果敗三年加使相太和二年改鎮東將軍充寧國軍節度使遇疾歸江都求醫至江陽縣卒年六十五

卷一萬八千一百三十四第十三頁

侯瓚

瓚字信美城濮人黃巢聚兵於曹濮瓚從之時年十六巢陷京師瓚逃歸鄆州時僖宗幸蜀徵十道兵討巢朱瑄以鄆城應命瓚為偏將預行尋復與諸道兵伐秦宗權皆以勇果聞頃之隨瑄弟瑾襲兗州瓚與瑾逆殺齊克讓破宿州瑾據有兗州瓚為

爪牙梁祖攻兗州力戰以却梁兵梁祖圍時溥於徐州兗鄆兵救之不利溥死梁兵遂攻兗鄆戰於城下者數年長圍三合而三却之時瓚常在瑾之左右大小數百戰隨瑾搏擊馳突出入敵中殺傷不可勝計乾寧四年隨瑾與太原將史儼掠徐泗瑾將康懷貞以兗州叛瑾無所歸與瓚等率兵數千走海州遂來歸行密投瓚衙將是歲梁祖大舉兵伐吳龐從古聶金率衆入自青口葛從周以精兵圍壽陽江淮大恐行密以兵萬二千會戰於青口時兵起倉卒加以陰寒戰士皆攘食飲雪而行甫及梁營則豎戈植足聞志未決瑾與瓚率五十餘騎潛濟淮入自壘北無梁而馳囂聲雷沸梁兵皆殞眩不能舉遂斬龐從古大

兵繼之死者大半鳴鼓西行破葛從周於壽陽沈其卒萬餘人於淝河梁人大震瓚功為多授左右隨從騎軍副使隨王茂章救王師範於青州破梁兵五萬餘殺友寧瓚復有功從周本攻蘇州戰於黃天蕩從徐溫却王景仁於壽陽逐劉崇於袁州朱瑾救徐州之圍及攻潁州瓚皆預戰累授滁州刺史太和三年卒年七十

卷一萬八千一百三十四第十九頁

朱景

景壽陽霍邱人少豪猾驍壯有膽畧為邑中所服行密得淮南以霍邱地界南北盜賊交會難可防限聞景之勇為遠近所畏故以委之且伺北鄙之奔突景招合無賴年少得絕伎者百餘

人撫禦之晝與捕獵夜分巡警月餘而材伎疆力無有及景者以是服從如一沿淮羣盜莫敢犯之梁祖聞其名命寇彥卿率勁騎三千襲霍邱圖取景且諭梁祖之意令降景率其徒戰於邱墟林澤中射死者無數彥卿兵折力殫而去康懷貞之至復為景所困王茂章來寇度淮水可涉處立表識之景易置於深潭水中立表浮木之上茂章軍敗望表而涉溺死者大半積其尸為京觀後破李進金何駟涉騎數千尋拜滁州刺史移光州刺史卒於任卷一萬八千一百三十四第十九頁

張崇

崇廬州慎縣人少以伉勇隸軍籍光啟中始補戎職從行密破

趙鏗有功乾寧二年行密攻蘇州崇為越人所獲行密欲嫁其妻妻曰崇忠孝必不負公請待之未幾崇果返以為諸將都尉遷蘇州防遏使越人攻蘇州崇從臺濛敗越兵於小白 天復

中安仁義叛崇復茂章率兵攻之擒仁義以功授常州刺史累遷廬州團練觀察處置等使天祐十一年加檢校太傅光州軍校王言叛崇討平之授平南軍節度使武義元年加安西大將軍梁祖遣將合湖南兵攻荊州以崇為應援招討使引軍攻安州降其騎兵二百而還遷德勝軍節度使加中書令太和中封清河郡王卒於治所年七十二崇殘酷暴斂淝人畏之嘗入覲議者盛言不返鄜市少年皆捋頤相慶崇歸聞之因斂捋頤錢

數萬貫尤好使酒殺人重掌奏刁鎔每謂左右曰吾醉慎勿令鎔出一日醉甚三召鎔至竟殺之詰旦召鎔左右曰已殺矣崇大悔取其首視之揖曰罪過員外其輕人命如此頗信鬼神家人求以厭息崇者先是后土廟塑韋安道配座乃遣巫女詐云天上謫后土與公為偶崇往視之巫女潛洩異香以為后土至矣崇乃命樂對像酣飲一夕家人竊其兵器盡寘廟中巫女報曰列仙不殺殺戰故遣六丁取至公不得更用此傷害崇因是大為改悔歷藩鎮二十年掠下以奉上每歲一入覲輸貢絡繹國中執事無不受賂故其肆虐凌下保全祿位終身為橫耳卷一萬八十一頁三十五第二頁

王綰

綰廬江人勇敢有謀光啟中始從行密破趙錕下蘇濠累有戰功署行營諸軍都尉兼漣水防遏使光化三年青州戍將陳漢賓殺海州刺史牛從義歸欵於行密行密命綰與張訓率勇士二十乘勢未附襲之漢賓設備不暇果出迎謁遂入府中諭以利害漢賓乃解甲聽命以功授檢校左僕射是歲青州王師範告沂密內叛授綰海州副使兼沂密兗鄆諸州副使與臺濠攻密州下之將擊沂州覘者曰城中偃旗卧鼓寂若無人綰曰此必有備而援兵近矣諸將曰密城既下沂易與耳綰不能禁但於茂林設備以待果攻沂不克援兵具至師既退為沂兵持其

後緝伏兵擊之沂人大北未幾代臺濛為海州刺史天復三年改漣州制置使天祐中復刺海州就加平盧節度使明年改定南大將軍知處州防禦使谿洞民多為盜至皆平之順義元年授百勝軍節度使召歸乾貞初卒年七十二

卷一萬八千一百三十四第十五頁

王稔

稔廬州人少驍勇始以騎射隸行密帳下累從征討有功乾寧中梁祖遣將葛從周討揚州稔與柴再用率兵禦之稔以六騎登高山覘梁軍為梁軍所圍候者望見之請以救兵往再用曰王稔辦事不須憂也稔與其徒解鞍而卧梁兵不敢上會暮圍兵漸合稔乃步依林木轉戰而行因是解去時止馬令峻遂重

襲梁兵奪馬而還軍中壯之袁州劉崇景叛湖南將許貞率眾來援貞單騎求鬪稔獨援長槊逐走之袁州平以功授滁州刺史又從徐溫破寇於山南遷壽州團練使未幾授清淮軍節度稔好儒學性寬厚褒衣博帶有同儒者先是壽春人多尚武復禁夜至嚴稔至惟閱經籍下帷肄業通宵無禁不數戰鼓篋待問者四境鱗萃每講肆開必饋以束脩旨酒鄉里薦舉歲常百餘人稔多力每選二勁弓弦如兩耳分手前引雙滿者數四乾貞三年歸授左右雄武統軍卒年六十六

卷一萬八千一百三十四第十五頁

李原

原蔡州人乾寧初歸行密為黑雲隊長破濠壽有功加檢校兵

部尚書改隸朱延壽將戰會立新軍每旗以五伍為制遣原以十旗擊其西偏不克而返延壽將斬之原曰彼眾我寡願更益師以往苟不勝敵死未晚也乃增以五旗原力戰梁人亂延壽乘之遂大敗行密聞之召歸授黑雲都指揮使天復中從臺濛破宣州天祐三年以兵授宜春深掠越境師還以功遷黃州刺史溥襲位授泰寧軍節度使同中書門下平章事卒於金陵年六十卷一萬八千一百三十四第十六頁

陳知新

知新廬江人從行密起兵攻畢師鐸孫儒皆有功屢以親軍攻定南北諸部多立奇績累授先鋒指揮使天祐元年率兵攻邑

陵破其水柵逐楚將許貞盡收其地拜岳州刺史三年加團練使是歲從劉存大舉師伐湖南會天大雨旋至瀏陽江為楚兵所襲存與知新戰敗俱被擒楚王馬殷親釋其縛且慰勉之冀為己用知新叱罵曰吾豈能負楊公而反事汝耶殷知不可留乃殺之家悉陷敵卷一萬八千一百三十四第十七頁

朱虔祐

虔祐潁州人少多力善戰初為義興令行密惜其材召居帳下常率眾居前從王茂章援青州去為軍鋒歸則殿後我軍背嶮虔祐以五百人當之追兵大至茂章亦留解鞍而寢虔祐促茂章亟去自與梁人戰殺傷無數日暮兵盡被擒士卒無求生者

以故我軍行遠追兵不能及梁人執虔祐見太祖太祖壯其事
欲釋之虔祐請死不得瞋目大罵被害行密厚恤其家後數年
嫁其妻詰旦行矣其妻沐浴禱之曰王愍我窮獨恐終不能自
存當嫁我於某氏嗟乎今日為君之妻明日他適矣君忠烈若
是歿豈無神遂弃我是夜無疾而卒夫忠婦義如此卷一萬八
千一百三
十四第
十七頁

九國志卷一

九國志卷二

吳

劉信

宋路振撰

信字興遠兗州中都人少豪勇善騎射始陷蔡盜許勅軍中勅
敗自滁州奔於行密及破秦畢頗著戰功大順中行密與孫儒
對壘一日召信受事信醉不能起行密罵之信出投賊左右請
追信行密曰信醉耳豈負吾者耶明日信果返孫儒平以功轉
騎軍副指揮使從破濠泗遷滁州刺史改左右隨從馬軍都尉
王師範據青州密人叛師範求濟師行密遣臺濠率兵破之信
先登破敵冒重瘡及青州犒師先求白甲軍增其賞蓋信所部

兵皆鐵鎧也天祐六年袁吉信撫州結潭人將復豫章改信鎮南節度副使率兵敗潭將苑玫於上高遷袁州刺史危全諷新破其將黎汾王藻聚殘黨為盜南城間信盡破之一郡遂寧十一年授鎮南軍兩使留後劉崇景以袁州叛信擊走之授鎮南軍節度使信為治苛猛民流言將反會王祺率舟師南上信意其圖已乃乘小舟解其冠帶詣祺請罪祺大驚謂曰奉命討譚全播於南康請公駐吉州以驚潭人非他也時虔城險攻之久不克祺以疫死遂改信為招討使全播懼因納欵信受其質而還徐溫方執政聞之大怒杖其使者信子彥英時為親軍校溫令將三千人往救之溫戒之曰爾父據上游之地擁數萬之衆

取一小郡不克而還是反也今授汝此兵可往助父反信聞之大懼即返旆疾趨克其城而還先是有譖於溫言其逗撓固縱全播至是信自獻捷於江都溫大喜復遣還鎮十六年吳王開國加信征南大將軍後唐莊宗即位遣諫議大夫薛昭文冊閔王假道豫章信勞之謂昭文曰皇帝知有信否昭文曰主上新有河南未熟公之名信曰漢有韓信吳有劉信異代其人也因指牙旗銀首舉卮酒以屬昭文曰射中此願公飲一箭而穿之觀者無不稱快信用親吏吉况輩聚欵財貨置積廳事日納銀滿其中莊宗伐蜀溫恐信為變急召歸江都為左統軍溫卒又傾心事知誥復歸鎮明年卒於治所年七十信將上章請立廟

於洪州許之卷一萬八千一百
三十四第十一頁

馮宏鐸

宏鐸漣水人少與張雄友善雄以事為吏所抑因與其徒入海為盜宏鐸隨之聚眾千人自號天成軍遂據上元雄卒宏鐸繼其位治水軍於金陵樓艦之盛聞於天下大順元年詔復以上元為昇州命宏鐸刺史遂增版築大其城為戰守之備行密定淮游因請歸附時田頵在宣州常欲窺視宏鐸介居二大國之間又郡中數有妖怪居人相驚忽抱負嬰孩奔走諭之不可止宏鐸心不自安遂悉眾南上其日淮口大風發屋拔樹大石巨木皆飄於空聲言將討豫章實欲襲頵頵自率舟師與戰於

昌山宏鐸敗沿流將入海行密自出東塘邀之先使人謂宏鐸曰用兵者勝負豈有常哉今眾力未損公何憂一郡而欲自屏於海外吾府雖小足以容君之眾使無失所若欲淮南節度吾亦當讓君捨此而去無謂也宏鐸左右聞之皆哭於是聽命行密乃升宏鐸舟執手慰勉一軍皆歡呼遂以宏鐸歸署揚州節度副使館給甚厚將吏皆分部安堵嘗與行密同祀漢高廟有二鳥闐於樹行密命射之宏鐸引弓伺便一發而二鳥俱墜天祐四年卒卷一萬八千一百
三十四第十四頁

賈公鐸

鐸字聲遠唐相耽之嫡孫生於上蔡遇亂為秦宗權愛將宗權

暴虐不軌鐸諫之不聽反見疑懼禍及乃挈家夜與屬卒千人出奔宗權嚴兵追之鐸且戰且行數日乃渡淮遇故人馮敬章導之襲斬春破其城推敬章為帥鐸為牙將塹城厲兵以自固行密命朱延壽攻之鐸方出獵延壽潛軍掩至圍其城鐸奔還度不得入以兵伏林中選士二人衣羊皮夜入延壽所掠羊羣中因得入城約城中夜半開門舉火為應再以羊皮復命鐸如期領兵趨城南門門中舉火乃力戰突圍得入延壽知其狀驚曰吾恐其潰圍而出今反潰圍而入如是則城安可卒平乃以鐸報行密令召軍中與鐸有舊者持誓書金帛與之和仍令延壽與之約婚小將柴再用應召而行鐸乃請盟延壽以妹妻其

子匡浩行密復授鐸左監門衛將軍乾寧二年加壽州左右軍光化二年授檢校右僕射天復三年加金紫光祿大夫檢校司空授黃州刺史天祐三年移光州刺史七年卒於治所卷一萬八千一

百三十四
第二十頁

危全諷

全諷臨川南越人世為農夫初生赤而毛醜狀駭人父母欲勿舉其姊保護之僅而得全及長人質明秀豪勇任氣乾符末所在寇亂乃招合同縣少年即其居為軍營鄉里賴焉時安南都護謝肇受詔安撫江嶺聞而嘉之補為討捕將表加憲職賊帥黃天感據龍安鄉朱從立據石牛洞皆竊稱名號官軍屢敗肇九國志

遣全諷討之暮年悉平中和五年黃巢餘黨柳彥章攻破臨川
逐郡守大掠而去全諷遂入之詔即以全諷為撫州刺史郡署
及鄂郭焚蕩畧盡乃悉心為理招懷亡散興緝圯壞不數年完
復如故時南平王鍾傳亦乘亂據有豫章朝廷因命為帥諸郡
亦多自立者皆不能恭承節度而全諷最強尤驕傲不遜遂為
勅敵久之傳不能忍自率兵討之既傳其城而城中夜火失士
民驚亂諸將請急攻之傳曰君子不逼人之危乃埽地而祭曰
全諷之罪無害於民煙焰遠止天之惠也翌日全諷聞之遣使
謝罪聽命請以其女嫁傳之長子匡時傳許之乃盟而還由是
稍修支郡之禮然豫章之人常畏之傳卒軍中以匡時為留後

全諷曰聽鍾郎三年為節度吾當為之既而我師圍豫章全諷
不能救及城陷乃謀東兵時宣州刺史王茂章叛入越假道臨
川 梁問全諷曰君欲大舉願見君之將士以卜濟否乃陳
師於野與茂章登城而觀之茂章曰衆凡幾何曰十萬茂章曰
淮南有三等將如公此等可當下將爾盍更益十萬乎全諷不
聽悉衆屯象牙潭自稱江西留後旁郡皆以兵資之湖南馬殷
又遣將高安以為之援軍勢甚盛豫章大恐將軍周本攻象牙
潭大破之擒全諷於郡諸郡皆潰楚撤高安之圍而遁於是克
定八郡之地送全諷維揚親詰之全諷不答初行密之攻趙錕
遣使通聘於臨川全諷報禮甚至糧運兵器皆取給焉至是以

舊恩釋之先是潤州刺史安仁義築第於邗溝之西因以賜全
諷資給甚厚天祐六年以壽終諸子随才叙錄全諷敬愛賓客
善撫士民頗有巧思多所興創今城郭館署皆其遺構也卷一
千一百三十
五第三頁

譚全播

全播南康人昭宗末嶺表寇亂全播與鄉人盧光稠相與聚兵
謀署首領衆推全播怒曰諸君舉事必望成功須藉良帥盧公
軀貌堂堂真諸君帥也衆唯唯未定全播拔劍三擊庭樹曰不
從令者與此樹同乃立光稠而全播為謀主所向多捷兵勢漸
盛遂破王潮之衆入據虔州推光稠為兵馬留後全播分掌城

中兵天復三年與潭人共伐番禺下韶州潭人不利乃引還光
稠命其子延昌守韶州其弟光牧果敗奔還潮人乘之伏兵四
起大破之擒其首將鄭廉遂從光牧圍潮州番禺救之乃引還
劉巖劉隱以廣州之衆伐光稠以報韶州之役旌旗相繼數十
里圍城十餘重光稠大懼全播曰吾諳劉公易與耳無足憂也
光稠喜曰虔與韶昔與君所共定也此日之事非君不能辦於
是治戰場於城南告戰期於劉巖巖令諸軍曰戰之日勿殺虔
兵悉可生擒之全播選精甲萬餘伏於隍塹邱嶇之間與老弱
五千鼓行而前數戰乃退巖縱兵長驅中伏發巖等大敗單騎
遁免斬首萬餘級光稠讓功全播泛讓諸將而不受自是光稠

大歎賞之俄有疾將以符印授全播不從光稠死延昌自韶州奔喪全播立事之延昌好游獵荒傲無度大將黎球俟其出獵閉壁門而殺延昌於城外球以全播不與己同謀將害之全播請老閉關不出後球方欲莅事見延昌持彈叱責之球中丸而死衙將李彥圖復知州事全播懼禍稱疾篤杜門李彥圖疑之與議親姻多方以覘其動靜全播應覘為狀終不可識廣州聞全播之病乃北侵陷韶州李彥圖卒其子不肖閉子城以自衛州人無歸相率詣全播第請為帥拒之不可遂從之遣使詣梁俄授萬勝軍防禦使五嶺虔韶二州節度開通使檢校太尉開國侯在任七年人物殷盛俄而徐溫命劉信伐之信以大衆填

其城壕全播令人潛為地道運其土壤深如故信以為神莫之測也攻擊萬端不能尅遣使說之令歛服全播請從溫聞之怒曰信以十倍之衆不能下一城何以取威敵國命回兵攻尅之擒全播以歸授左威衛將軍領虔州如故卒於江都年八十五當盧光稠之末舉南康先有謠言曰盧破黎頭出李子始花開潭深魚正聚楊柳西邊裁既而光稠有南康至子延昌而破黎球繼球死李彥圖繼之全播方盛柳者劉也而楊氏命劉信攻取之一郡之地何冥數之符若是乎

卷一萬八千一百三十五第四頁

李濤

濤趙郡人祖遠唐杭州刺史父逸壽安令濤涉書史會唐末四

方盜起乃投筆從軍光啟三年秦彥囚高駢濤從行密義舉列
八寨維揚西彥盡以步騎背城求戰俄而彥軍已破一寨諸將
以兵勢相懸宜堅壁勿出濤怫然曰今以順伐逆豈論衆寡設
令欲退將焉歸濤願以所部為前鋒請觀破賊行密壯之遂出
戰果敗彥軍自是無敢復出濤以功遷騎軍都尉渥襲位授和
州刺史初行密既卒張顥陰有異志以都統符印送宣諭使李
儼行事嗣王意未決一日諸將共議四座畏顥無敢言者濤曰
都統符印是昭皇御翰所賜王父子承襲用在不疑苟付他人
中外安仰諸將以其辭正皆伏議顥獨默然投袂而去渭襲位
遷吉州刺史十年授行營招討使攻越臨安濤敗陷於越順義

元年吳越通好杭人厚禮歸之授左雄武統軍加泗州防禦使
遷寧遠軍節度使太和四年卒年七十二

卷一萬八千一百
三十四第十四頁

鍾泰章

章字憲明廬州合肥人少不拘細行雄果有四方之志中和中
行密據合肥召置帳下累從征討皆克讓有功天復三年朝使
李儼至行密得承制拜授以功歷左監門衛將軍天祐五年張
顥弒渥將出徐溫州守潤州以圖自立溫與嚴可求謀非章不
可除顥章知之因選士三十人夜集軍舍椎牛享之刺血而飲
以為誓溫謂曰吾有老母不若且止章曰斯事一言既出寧可
中輟耶明日章與姚克贍殺顥於衙堂遷檢校尚書左僕射左

衙副指揮使從周本攻越州拔衆夜歸越人襲之章以二百人散樹旌於菰蒲間越兵退去絕糧三日章壯氣無衰章自以除顯功大賞薄會與骨言爭握槩因譁語較軍功以及之温聞而嘆曰斯固吾過也明日加章滁州刺史滁民有訴章者章詣金陵自理温逆謂之曰前事為理已改授公光州矣章遂之任未幾遷壽州團練使會疆吏告章侵市官馬因遣王稔以巡霍邱為名往代章章歸中途改饒州刺史俄召歸金陵在郡二年加同中書門下平章事章多力嘗怒其家人其人匿避章愈怒因拉折鐵杵後卒於治所年六十二

朱瑾

卷一萬八千一百三十四第十三頁

瑾宋州下邑人也雄武儻有吞噬四方之志光啟元年汝陽曹全昱遇害軍城無帥鄆兵共推瑾兄瑄為留後瑾之季仲俱為列校明年兗州齊克讓妻女於瑾瑾伏兵仗假稱聘禮改服甲士詐為昇夫而往親迎夜發卒殺兗州軍校王稠膚遂虜克讓詰旦自稱留後三年夏秦宗權併兵攻夷門梁祖幾至不守會瑄援至合梁祖兵大戰城北瑾單騎嘗寇馳突往返當者無不披靡宗權敗走自是瑾與梁軍互為犄角屢破宗權朝廷以功授兗州節度使未幾梁祖交惡於瑾遂成仇敵大順二年冬瑾率兵萬人攻單父梁祖遣丁會禦之瑾軍大敗於金鄉景福初梁祖攻徐州瑾率全軍來援時溥擊梁軍殺其將霍存因席

卷十餘寨乾寧元年梁祖親攻鄆瑄瑾合兵迎戰敗之於東河
二年春梁祖將朱友恭攻瑾塹其城守之是時連歲交兵四郊
無耕織瑄瑾勢感因間遣使乞師太原李克用假步騎五十濟
河梁人退舍十月梁祖復親攻兗州塹圍之瑾單騎求鬪梁將
無應敵者瑾兄瓊先以齊州納欵於梁梁師使瓊臨兗州說瑾
瑾怒瓊無急難之意偽遣使告降梁祖自至延壽門與瑾交說
瑾謂梁祖曰兗城印符他人莫可付願得兄來付與既而梁祖
遣掌謁劉捍與瓊偕至瑾馬立橋上遙謂捍曰願兄先來乃麾
將士擒瓊徑入未頃城上大譟擲瓊首於外梁祖大悔因班師
馬四年正月鄆州先下瑾亦糧盡與晉將李承嗣史儼求軍食

於野梁將龐從奄至城下瑾將康懷貞率瑾子私以兗城送欵
歸不得入引承嗣諸軍將保沂州為其將尹處賓拒關不納瑾
狼狽將奔海上復追之後泊乃渡淮歸於行密行密迎之於高
郵待以殊厚立解所服玉帶為贈擇甲第遺財帛鉅萬表瑾領
武寧軍節度淮南行軍副使是冬梁祖遣將龐從大寇青口行
密親征之令張訓以羸兵前導從意輕吳師貪奕棋不顧瑾請
假梁人旌旗率騎潛濟突入從中軍營行密得引兵急渡爭破
諸柵遂擒從斬之乘勝攻溍河軍葛從周敗走光化二年春從
行密攻彭門移師侵宋梁祖屯睢陽以禦瑾會天大雨與瑾交
綏而退天復三年授瑾東面諸道行營都統平盧軍節度使同

中書平章事天祐十三年淮南小校馬謙李球乘酒脅衆挾渭
登樓發武庫兵為亂陳於門橋北外衆屢却會瑾自浙西至惟
引一騎視其坐起云此不足為禍因返顧外衆推乎一呼亂兵
皆潰去遂擒謙是冬與行軍副使徐知訓率兵攻潁州梁人援
至而解渭將開國知訓患瑾位加於己請以泗州建靜淮軍出
瑾為節度先是瑾因朔望令女妓通候問於知訓知訓淫縱強
欲私之瑾心已不平復有是行會知訓夜張祖筵瑾中宵先起
詰旦度知訓酒方困復留刺以去既盱知訓果來謝瑾因延入
室出其妻陶氏知訓方拜瑾以笏擊之踣於地左右自外突入
殺之初瑾先繫二惡馬於廡下及將圖知訓密令釋其羈紲馬

果蹄啣外人莫得聞變因斬首以出知訓從人數百瑾扼臂叱
之俱避易散去復乘知訓馬馳入府中訴於渭云今日為大王
除患渭曰此事吾不敢知因命瑾疾去瑾忿以知訓首擊柱詬
渭曰懦夫安足與成事携劔復出望府門已闔因踰垣折足大
呼曰吾為萬人除患今以一身當之耳遂自刎夷其族時年五
十二

卷一萬八千一百
三十四第八頁

米志誠

志誠沙陀部人少便騎射以驍勇聞乾寧四年奔於行密龐從
寇青口葛從周寨淶河志誠俱為前鋒連戰皆勝以功遷馬軍
指揮使田頔叛於宣州志誠與臺濛敗頔於廣德天祐六年危

全諷將伐鍾陵湖南遣苑玫屯上高以為全諷聲援命志誠與王祺率兵破之十年從徐溫敗錢瑛於梁谿後又破王茂章於淮上十一年隨柴再用討劉崇景於袁州敗袁人於萬勝崗崇景棄城遁去遂入之先是袁人兒童聚戲冗地為釜圈箸為甑曰將柴米來至是果應以功加檢校太傅領泰寧軍節度使十五年朱瑾殺知訓携其首入府中志誠聞之被甲引其子并親從十餘騎至天興門問瑾所向聞瑾已死乃歸徐溫疑其助瑾遣使殺之嚴可求懼其不克遣人偽自袁人至告大破楚人諸將皆賀志誠亦入因伏壯士斬於棘門之下諸子皆棄市卷一十一百三十四頁

翟虔

虔彭城人也乾寧初徐方將陷虔盡室南渡謁行密於廣陵及徐溫典右衙以虔為軍佐屬張顥之亂溫與嚴可求陰計其事密遣虔往復傳導及誅顥虔有力焉因授子城甲仗諸庫院鈐轄等使天祐十五年朱瑾殺徐知訓挈首突入府門時兵衛倉卒莫敢抗禦虔驅率散卒共閉閤瑾以是不得出遂踰垣折足自刎而死會米志誠引十萬騎問瑾所向聲言以襲瑾為名虔乘閤謂曰瑾已戮矣何不急自歸營因是志誠遂返渭喜其應機却賊以瑾宜陵莊賜虔為賞及吳國建復旌其勲授閤門宮城武備等使領光州刺史順義四年溥幸白沙對徐溫呼雨為

水溫請其故溥曰此是翟虔父名吾慣諱矣因言宮內諸王須索虔多阻限不時進納溫欲斬之為溥救護而免黜於撫州未幾授行軍副使及廉使徙任虔知本州軍事七年卒年六十三

卷一萬八千一百三十四第十四頁

張可琮

可琮不知何處人中和之亂奔於江淮行密識其勇毅擢在左右破孫儒於宛陵先登陣陣稍遷列校時吳人初得宣城毘陵之地無錫居越人之衝患其攻擾天復中選可琮守之錢鏐忌其名棟驍將卒二千中夜襲之邑中大擾可琮閱兵得百餘人皆乘城疾戰越人驚潰而去吏士皆賀可琮笑曰彼衆我寡其

勢未已方復勞諸軍一陣爾於是息燈火屏旗鼓若空邑然越人偵之以為宵遁果復至可琮約將士候其附城突擊大破之寇盡潰去方告於郡守李簡簡雖怒其不時告且壯其事列上其功後以徐溫之命掠東洲下之即以為制置使天祐中除江陰縣鎮遏使遂城江陰沙山之役可琮以江陰之衆供軍旅展斥候無闕謀徐溫喜之擢拜常州刺史大修城隍民賴以安順義五年卒年六十五

卷一萬八千一百三十四第十八頁

鄭璠

璠汝南人始事秦宗權後隸孫儒入淮南尋歸行密前後戰伐皆預行光化四年授左先鋒兵馬使是歲從李神福攻臨安擒

越將顏全武方宇等四十餘人遷左衙將天祐初王茂章征安仁義於潤州泊城陷中十餘瘡以功遷左先鋒都尉從攻豫章璠以所部發機飛火燒龍沙門率壯士突火先登入城焦灼被體以功授檢校司徒復從柴再用與越人敗及陳璋復東州璠城而守之復會呂師造攻蘇州與人戰虜其次將陳綰璠左脇中弩幾死授蘇州行營都指揮使周本擒危全諷於象牙潭璠所部功多又攻新淦縣克而守之尋以張宣代歸復佐周本攻袁吉緣山疾戰悉收其巖壁焚之民皆復業十五年從王祺劉信攻虔州克之授璠羅城使順義元年領饒州刺史六年知楚州率兵授汀州軍事乾貞元年就拜團練使二年授鎮南軍節

度副使知軍府事大和三年授饒州刺史五年遷金陵行軍副使卒年六十六

卷一萬八千一百三十四第十八頁

楊彪

彪宿州人身長七尺餘呼聲如鐘倜儻有武幹善騎射行密見而壯之擢授衙內散指揮使渥嗣位潭人犯邊授西南面行營護軍副將謂諸將曰彼衆我寡未欲輕動乃守其要津以輕兵挑戰登高以望之見其麾下進退不一彪笑曰非勅敵乃縱兵出戰親射其首將殺之順風焚其艦溺殆盡凱旋擢授江陰鎮遏使徐知誥鎮潤州克都尉以從越人寇無錫東南大震知誥東征彪與陳再過領死士千人於路次弓弩忽發越人驚擾又

竊賊號令以入其壘殺獲甚衆明日又戰自旦及辰未決彪躍馬疾馳之越人遂退師還以功授殿直軍副使與郭悰分直宿衛徐知誥謂之曰郭悰猛而少機警宿衛之職惟爾是賴太和三年卒年五十二

卷一萬八千一百三十四第十九頁

陳祐

祐歷陽人年十七歸行密於合肥從入廣陵孫儒來襲吳師亂祐之卒伍獨成列泊入宛陵稍遷為偏校時行密修貢於天子祐應募而行達於朝廷制授兼御史中丞從攻滁濠壽等州下重甲先登戈傷弓墜而復上敗龐從葛從周朱友寧皆預戰有功秦裴下豫章時朱思勅范師從陳璠以兵戍之鐻等皆渥之

腹心也張顥忌焉令祐以渥命往誅之三校皆勇士也顥既遣祐行甚憂之祐踰險輕行六日至豫章微服懷短兵入秦裴帳下裴驚其來且告之故因責裴以不能制三帥而令有異謀裴懼未及對祐乃令召思勅等宴會及至則祐已與裴飲矣三校入見祐皆色變俄而酒三行祐數其罪悉叱而斬之以歸徐溫之誅張顥祐有力焉天祐七年越人侵無錫徐溫自征之祐率黑雲都尉以從諸軍未集祐告溫曰寇謂我勞頓而至未能陣也願以所部先薄之大軍見可則進溫從之祐詭道以出賊後會大軍夾攻大敗之十三年溫在潤州小將周郊詐稱役徒懷短兵入府多殺軍吏而衛士無兵仗拔武庫之楨出兵仗授之

以戰或有自後擊祐傷腦踣於地從者負之息於門下稍蘇時賊雖息府中尚擾升樓傳呼不能止祐舉首叱之衆皆投兵仗罷去温手封其傷授黑雲都尉温遷金陵制宮室府署命祐董其事以功授檢校司空太和元年授饒州刺史卒於任年六十五卷一萬八千一百三十四第十九頁

劉權

權許州人少從軍於蔡州景福元年來歸行密入淮南隸田頔麾下累遷同州節度副使光化二年頔與越人戰權乘勝深入為寇所得錢鏐見而慰之曰爾壯士也吾終不以俘虜相蓄洎通和縱之歸渥襲位補衙將渭開國以權侍衛勤肅授左衙副

校檢校右僕射從周本攻蘇州回為右衙列校為毘陵子城使率海船與越人戰勝充洪州都督長史領吉州刺史潁川之役授行營都虞侯時徐知訓為帥而軍政皆委朱瑾梁將袁象先帥步騎救潁瑾晨發望西北皆昏黑知梁兵將至召權與議值天大寒權幅巾錦袍而至瑾問曰爾何職曰行營都虞侯瑾曰是職也動必為諸軍先今氛興西北陰霾閉天此梁人至矣爾司斥候尚為此服且軍禮何在叱左右執之就戮知訓徒跣而往救之僅免時梁祖兵已至戰少不利乃引還及瑾殺知訓城中恐懼將從而為變權出師而瑾自殺衆乃肅然徐知誥至自丹陽遷左右軍都押衙事武義元年領雄武大將軍六月從徐

溫與越人戰於沙山洛社敗之俘其卒數千七月從知誥戰無錫大破越人二年卒

卷一萬八千一百三十四第二十頁

崔太初

太初淮西人父亮蔡州監牧副使太初身長七尺勇力過人中
和末以大刀長槊應募行密見之偉名居帳下歷壽州衙內副
指揮使天復中田安將謀叛行密疑朱延壽與之結交太初累
從延壽征討曾諫延壽及延壽擒行密嘉其意遷太初衙內都
指揮使天祐十五年從徐溫破王茂章遷本州司馬權知壽州
團練事先是壽春自乾符後守卒俱為多謀彊力者據而後奏
報以要恩及陳紹卒宣王遣王定持虛銜官告以往度令可授

者與之定以軍政雖出太初而職在衙將窺審言之次因潛報
太初曰詰朝若州之符印再至於君慎勿更讓明日召諸將齒
先以符印置座末以次遞捧而上及審言而止定曰王府之命
非窺公而誰然合更相推以成禮也審言如教復至太初定曰
唯公不可多讓乃麾其下位者俱令列賀復數日軍州無異議
始以官告授之有密譖太初常蓄鄉關之念者會徐知訓征潁
州路出壽春且觀其意太初著烏帽草履徒步至塌山為知訓
馭馬五十餘里知訓見其屈降前疑大釋太初不喜儒生多疑
好察每通衢交會之所牆必置耳常謂人曰還聞牆有耳否又
曰非牆耳乃吾也由是行路之人鮮敢偶語者召歸授右雄武

大將軍加檢校太傅同中書門下平章事守左殿直統軍太和三年卒年六十六

卷一萬八千一百三十五第三頁

陳彥謙

彥謙毘陵人少負壯節有剴繁治劇之才行密定江表召為潤州司馬以幹局聞徐溫鎮浙右以機務為寄彥謙亦坦然不疑言行計從人莫能間溫欲居金陵問策於彥謙對曰金陵昔為王者都今實近畿關輔也作鎮於彼其誰不往溫從之遷彥謙金陵大都督府右司馬營度外城府署三年而畢上經費之籍天祐十五年朱瑾殺徐知訓溫急召謂之曰蛇豕雖亡枝蔓猶在今就廣陵除其餘孽及梁祖即位隴蜀建號彥謙勸溫諷渭

建朝廷及更章服彥謙頗有力焉溫嘗閱帑藏見金帛委積因曰此三軍物吾豈敢有然致此盈衍公之力也因授鎮海軍節度判官無錫之役未戰而溫疾吳越兵攻其帳我軍相顧失色彥謙即引旗鼓詭遷於左其攻稍息及敗越兵遷楚州團練使諸藩郡歲時伏臘爭獻賂遺溫悉令納之病溫親往慰問自調湯藥臨卒爭疏十餘事首即以用嫡嗣為請順義五年卒年六十

卷一萬八千一百三十四第二頁

高澧

澧越州人祖實唐武寧軍節度使父彥湖州刺史澧為錢鏐之將累功遷特進湖州刺史武義軍使天祐七年以受疑挈家屬

二百餘口甲卒五千來奔授淮南節度副使澧嗜酒好俠殺人而飲其血日暮必於宅前後掠行人而食之一旦醉在樓上王寬經其下澧召之登而命左右去其梯操鋌於旁而以酒虐寬寬為所圖乃以大觴酢之澧皆推觴寬躍而取其鋌橫之於膝乃慢罵澧連以觴罰之澧辭不飲寬乃引鋌逐之澧環席而走叩頭乞哀併飲十觴卧不能興寬乃下樓徐去泊上馬命以鋌還之十五年徐知訓為朱瑾所殺徐溫遷怒誅之

卷一萬八千一百三十四

第二十一頁

